

## AUGLÝSING

### um myntútgáfu.

Á grundvelli laga um gjaldmiðil Íslands, nr. 22 frá 23. apríl 1968, mun Seðlabanki Íslands á næstunni gefa út 5 krónu og 50 aura peninga, sem skulu vera lögaurar í allar greiðslur hér á landi með fullu ákvæðisverði. Eru peningarnir með svofelldri gerð:

1. 5 krónu peningurinn er 20.75 mm í þvermál og vegur 4 grömm. Málmhlutföll hans eru 75% kopar og 25% nikkell, sem skeikað getur um 1% innan nefndra hlutfalla. Á framhlið peningsins er tölustafurinn 5 fyrir miðju milli birkigreina og þar fyrir ofan „ÍSLAND“, en fyrir neðan „KRÓNUR“. Á bakhlið er ártalið 1969 undir skjaldarmerki lýðveldisins. Rönd peningsins er slétt.
2. 50 aura peningurinn er 19.00 mm í þvermál og vegur 2.4 grömm. Málmhlutföll hans eru 79% eir, 1% nikkell og 20% zink, sem skeikað getur um 1% innan nefndra hlutfalla. Á framhlið peningsins eru tölustafirnir 50 fyrir miðju milli birkigreina og þar fyrir ofan „ÍSLAND“, en fyrir neðan „AURAR“. Á bakhlið er ártalið 1969 yfir fánamerki lýðveldisins, sem er umlukið lárviðarsveig. Rönd peningsins er riffluð.

Þetta er almenningi gert kunnugt hér með.

*Viðskiptamálaráðuneytið, 18. júní 1969.*

**Gylfi Þ. Gíslason.**

*Þórhallur Ásgeirsson.*

4. júlí 1969.

Nr. 165.

## REGLUR

### um starfslaun listamanna.

#### 1. gr.

Fé því, sem veitt er í fjárlögum til starfslauna handa listamönnum, skal úthlutað af þriggja manna nefnd, er menntamálaráðuneytið skipar til eins árs í senn. Í nefndinni skulu vera formaður Bandalags íslenzkra listamanna og formaður Út-  
hlutunarnefndar listamannalauna, en þriðja nefndarmanninn skipar ráðuneytið án tilnefningar, og er hann formaður nefndarinnar.

#### 2. gr.

Starfslaun skulu veitt eftir umsóknum samkvæmt auglýsingu starfslaunanefndar. Í umsókn skal gerð grein fyrir viðfangsefni því, er umsækjandi hyggst vinna að, og veittar aðrar þær upplýsingar, er nefndin telur nauðsynlegar.

#### 3. gr.

Starfslaun skulu miðast við byrjunarlaun menntaskólakennara á hverjum tíma. Skulu þau veitt til þriggja mánaða hið skemmsta, en til eins árs hið lengsta.

## 4. gr.

Auk þess að annast ráðstöfun starfslauna skal starfslaunanefnd kanna eftir föngum, hvernig listamönnum verði með öðrum hætti sköpuð æskileg vinnuskilyrði með nýtingu húsnæðis og annarrar aðstöðu, sem tiltæk kann að vera á vegum ríkisins hverju sinni.

*Menntamálaráðuneytið, 4. júlí 1969.*

**Gylfi Þ. Gíslason.**

*Birgir Thorlacius.*

## AUGLÝSING

**um breyting á auglýsingu um takmarkað leyfi  
til dragnótaveiða sumarið 1969.**

Samkvæmt tillögum Fiskifélags Íslands hefur sjávarútvegsmálaráðuneytið ákveðið eftirgreindar breytingar á reglum þeim, sem settar voru 12. júní s.l. með auglýsingu um takmarkað leyfi til dragnótaveiða sumarið 1969:

Bátum innan lögmætra stærðartakmarka, sem skráðir eru og gerðir hafa verið út frá verstöðvum á Norðurlandi og leyfi hafa fengið til dragnótaveiða, eru heimilar dragnótaveiðar á svæði frá línu, sem dregin er réttvísandi norður úr Hornbjargi austur um að línu, sem dregin er réttvísandi norðaustur úr Font á Langanesi með sömu takmörkunum og áður hafa verið ákveðnar. Þó eru dragnótaveiðar óheimilar á innanverðum Skjálfaflóa á tímabilinu 12. júlí til 15. ágúst n.k. innan línu, sem dregin er úr Brikurskeri við vestanverðan flóann um Lundey í Héðinshöfða við austanverðan flóann. Á tímabilinu frá 16. ágúst til 31. október eru dragnótaveiðar óheimilar á innanverðum Skjálfaflóa innan línu, sem dregin er frá innra horni Skálavíkur við vestanverðan flóann um Lundey í Héðinshöfða við austanverðan flóann.

*Sjávarútvegsmálaráðuneytið, 11. júlí 1969.*

**Eggert G. Þorsteinsson.**

*Gunnl. E. Briem.*

## AUGLÝSING

**um bann við veiðum með botnvörpu, flotvörpu, dragnót og herpinót á  
á hrygningarsvæðum síldar í fiskveiðilandhelgi Íslands.**

## 1. gr.

Á tímabilinu 25. júlí til 16. ágúst 1969 er bannað að veiða með botnvörpu, flotvörpu, dragnót og herpinót á eftirgreindum svæðum innan fiskveiðilandhelginnar:

1. Fyrir suðurströnd landsins á svæði innan línu, sem dregin er í 3ja sjómílna fjarlægð frá fjörumarki meginlandsins og takmarkast að austan af lengdarbaug 21°57' vesturlengdar og að vestan af lengdarbaug 22°32' vesturlengdar.